

# 佛说大威灯光仙人问疑经

隋天竺三藏法师闍那崛多译



南無本師釋迦牟尼佛

## 说 明

本简体校正版《佛说大威灯光仙人问疑经》电子书，是根据《乾隆大藏经》大乘五大部外重译经，第 0207 部，隋天竺三藏法师闍那崛多译《佛说大威灯光仙人问疑经》影印本校正的，标点符号仅供参考。特此说明。

仁慧草堂

二〇一七年八月

## ● 起诵仪

### 香赞

(一编)

炉香乍爇. 法界蒙熏. 诸佛海会悉遥闻. 随处结祥云. 诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

### 开经偈

(一编)

无上甚深微妙法 百千万劫难遭遇  
我今见闻得受持 愿解如来真实义

# 佛说大威灯光仙人问疑经

隋天竺三藏法师闍那崛多译

如是我闻：一时，婆伽婆在伽耶城成道未久，与诸比丘一切众俱。其中，或有得于一果及以二果、三、四果者，随其得果所有功德，皆悉明净。复有九十九亿诸菩萨众，及二十八亿诸天众等；复有比丘、比丘尼、优婆塞、优婆夷无量众数，及六万力士、十二亿等诸尼乾子；复有八万四千五通仙人；复有五百诸外道等。皆悉以灰涂于身体，露现胸臆，肉尽脂消，惟余皮骨，伛偻曲背，结发自裹，披树皮衣，手执瓶罐，处处寻求语言论义。

尔时，世尊如须弥山处黑山内，光明照耀，威德绝伦；如末世尊亦复如是，于诸仙中，为最第一。又如六牙清净白象独自在于白羊群内，如月夜朗映蔽众萤，如曼陀华生芦苇町，如金翅鸟处在乌群。世尊于彼诸仙众中亦复如是，威德照明，倍复殊胜。

尔时，世尊即便入于宝舍三昧，现无量神通，普放净光，遍身明曜，于身左右，遮相交绕。又于自身出无量亿诸化佛身，一一化身复出无量亿

诸化佛；复自身中出无量亿诸菩萨身、无量帝释身、无量梵王身、无量四天王身、无量百千阿罗汉身、无量百千比丘、比丘尼、优婆塞、优婆夷身、无量大转轮王身、无量小转轮王身、无量粟散诸小王身、无量东海洲中边地人身、无量南天竺等所有诸地一切人身、无量刹利大姓、诸婆罗门等、大富长者、一切人身，如是等种种形类，种种服饰，种种言说，所有一切诸天界分，一切皆从如来身出。

尔时，一切大众，各怀疑心，遍共相观。时诸菩萨，皆大欢喜，雨诸珍宝供养之具，乃至瓔珞，供养如来。

尔时，世尊现是瑞已，还从宝舍三昧起。起三昧已，如狮子王嘖呻顾视，普观十方。观十方已，实时见彼十方世界，一切所有诸佛刹土，及此娑婆大千世界，以佛眼观，分明显现，犹如掌中。如此释迦如来放大神通，种种变现。十方一切诸佛，亦复如是现化佛身，从化佛身示化佛身。彼诸如来所有化佛，皆来云集世尊大会。复有无量恒河沙等诸菩萨众，比丘、比丘尼、优婆塞、优婆夷过诸譬喻，各执种种供养之具，随其所应堪供养者，来诣佛所。复有天、龙、夜叉、乾闥

婆、阿修罗、迦楼罗、紧那罗、摩睺罗伽、人、非人等一切大众，随其住处，皆见如来神通力已，从彼而来，赴此海会。

尔时，十方诸来菩萨，各以无上供养之具，供养如来。设供养已，各以六波罗蜜之所成就师子高座，随其身量称座而坐，乃至人、非人等，各称身座，复座而坐。释迦如来所教化者，上至阿迦尼吒天，下至阿鼻地狱，所有化类，皆悉而还，还已，当于是时，以佛力故，皆见十方诸佛世界，犹如一会，所有十方一切诸佛所教化者，一切皆从释迦如来诸毛孔入；释迦如来所教化者，皆从彼佛身诸毛孔入。现如是已，当尔之时，于彼众中，有一菩萨名曰胜分，从座而起，进止庠序，容貌端严，偏袒右肩，右膝著地，合掌向佛而说偈言：

佛世甚希有	为众故显现
此事未曾有	覆蔽一切魔
遍共相观面	唱言希有事
我等何故来	出言我破坏
我等辈可怜	惟首骸骨消
我等既羸瘦	枯老复失乐
无言字神通	覆翳我道刺

大神通佛子 今自显佛法  
此众生疑心 复生大欢喜  
此会皆出言 我等愿作佛  
文殊在众中 佛子众围绕  
文殊侍多佛 来显说神通  
为何法现相 今佛说何法  
咸生是疑心 愿为我众说

尔时，彼众中以魔力故，有一仙人名威灯光，即白胜分菩萨言：“童子，汝且默然，我今发问，若是沙门能决于我心所疑者，乃可得名为萨婆若。若不能决我疑心者，云何得名一切智也？如是神变若幻作者，摩醯首罗、那罗延等所说呪咀，凡世间人用是法故，亦能成就诸如是等无量之事，岂足为奇？”作是语时，如来世尊熙怡微笑。既微笑已，普观诸仙一切大众。观察众已，即告威灯光大仙人言：“汝威灯光，今正是时，恣汝所问，如我智力，为汝解说。”

尔时，威灯光大仙人即问佛言：“瞿昙沙门！先与我说众生体者，从何处生？几粗几细？众生内体性者，为一搩耶？一尺耶？一指耶？乃至若大麦、小麦、大豆、小豆等分耶？乃至芥子许众生内体性耶？”作是问已。尔时，世尊即赞威灯

光大仙人言：“善哉！善哉！汝威灯光快问是义，如六万劫寿命者。”

尔时，世尊作是语时，诸仙人等皆大惊怪，作是念言：“我等与彼大仙久居共在一处，犹尚未知大威灯光寿命算数，今是瞿昙云何速得如是觉知？”

尔时，世尊即复告于彼威灯光大仙人言：“汝大仙人，谛听谛受，善思念之，吾当为汝具足善说。汝问我言：‘众生体者，从何处生？’大仙当知，实无言说，无有字句可说，众生有所从来，但以无明行等诸因缘故，起彼众生；乃至生老病死等诸因缘故，起彼众生。大仙，复有因缘能起众生，所谓以母为因，以父为缘，得生众生；复次，父母和合以之为因，邪念妄想起诸业风，吹识种子置胎藏中，即是彼缘；复次，苦圣谛，集、灭、道圣谛是众生也；复次，五阴分、十八界和合故是众生也；复次，大仙，不离众生有业，不离业有众生，众生是业，业是众生。汝当知之，众生界者，不增不减。”

大仙人言：“瞿昙，若众生界不增不减者，何故众生舍垢身已，得自在身？”

佛言：“汝大仙人，如汝所言，是大不可！



何以故？若自在得自在者，应不堕落，常在自在中。若自在身不得自在者，云何名得自在也？大仙人，譬如萤火虫作是心念：‘我光明焰悉能遍照于阎浮提。’假使萤火虫实能放光遍照阎浮提者，终亦不能使无伏心者得名真自在。复次，大仙，若自在得自在者，应尽诸烦恼垢；不自在故，应长诸烦恼。若诸烦恼垢与自在等共有者，是故众生界，无有增减而可见也。”

时，大仙人复言：“瞿昙！汝可不作尽诸烦恼耶？”

佛言：“汝大仙人，我亦不作尽诸烦恼，亦复不增诸烦恼。”

大仙人言：“今汝瞿昙，若如是者，亦不应言我得自在。”

佛言：“大仙，如是！如是！大仙当知，我亦不言我得自在。何以故？我无实故，亦不自在。”

大仙人言：“汝瞿昙且置是语！瞿昙，如汝前言，父母和合得众生者，何故多人共和合，少有众生而得生耶？此义云何？”

佛言：“大仙，我今为汝所引譬喻，随汝所能，为我解说。汝大仙人，如有一子中多有树生，复一树中有无边枝，一一枝中复无量华，是一一

华应各结果，何故有结、有不结者？若已结者，皆应成熟中作种子，何故复有熟、不熟者？此义云何？”

大仙人言：“瞿昙！由风吹故，有结、不结。若已结者，堕落不熟，不任为种。”

佛告大仙人：“以业风自转吹业众生，果堕落故，少有众生而得生耶？大仙人，汝当知之，若在胎中，或为虫食，或为业风转为碎末。汝当知之，树灾堕落少不足言，所有众生为灾堕落多不可说。复次，大仙人，以邪心故起众生界，若诸众生能有几许心想转者，还复尔数受后有生，是故我言，邪心故起众生界。”

尔时，大仙人言：“瞿昙！如是！如是！如我所问，汝已答我，此义得成。瞿昙，更复为我解说，何以故有劫烧尽也？”

佛言：“大仙人，汝当知之，无作故名为法界。若劫尽时，大地不烧者，法界便有二种，少有分是无常，少有分是常。若如是者，是诸如来则亦不成为实语者。若一切无常，无为法中不可思量者，是故如来得名一切智。”

尔时，大仙人闻是语已，回首顾语自诸弟子言：“汝知之不？此瞿昙者真成是于一切智也。”

尔时，世尊复更重告大仙人言：“若劫尽时，一切大地不被烧者，不得分别此是初时，此是末时。亦复不知好丑业果、善恶等报。汝当知之，此劫烧时，焚荡尽者是诸如来大方便力之所为也。所有众生，若能闻信劫当烧尽洞皆然者，尔数众生，诸如来边受诸摄受。汝当知之，如大蟒蛇身分所有眼耳口鼻，以毒力故，悉能摄受一切飞走杂类众生。应知如来亦复如是，以布施爱语，利行同事法毒力故，悉能摄受调伏一切诸众生也。大仙人，又如有人，以其金铤置在火中，不以瞋恨置于火中，以不熟故，欲令成熟，为欲成就真宝物故，为令价大得多财故，置金火中，连椎交打，柔软清净。如是一切诸众生辈，莫不皆因诸佛如来放劫尽烧而得调伏，如是劫尽大地烧时，实无众生受苦恼者。”

大仙人言：“世尊！希有！可得劫尽火焚烧然大地坏时，无一众生受苦恼者。”

佛言：“不也。大仙人，诸佛如来不令一众生受逼切恼，何以故？大仙人，譬如十方微细雨滴，彼诸雨滴宁为多不？”

大仙人言：“甚多。世尊！”

佛言：“大仙人，诸佛如来、十地菩萨倍多

于彼。当尔劫尽大地烧时，于上虚空中，以慈悲智慧身手解救众生，不令有苦而触身也。所以者何？以彼诸佛如来、一切菩萨，妙身广大，相好端严，众生见者，无不欢喜，生正信心，唱如是言：‘我等愿于未来世中，皆得成就如是除拔，还得成就如是形色、如是相好端严之身。’当于是时，又有心解脱已得阿罗汉果者，或有猷离心生得须陀洹果、斯陀含果、阿那含果证者，或复有得无生法忍者，有得不退转地者，有得生于四天王天上者，有得生于忉利天上、夜摩天上、兜率天上、化乐天上、他化自在天上者，略说乃至有得生于阿迦膩吒天上者。当于是时，所有一切大转轮圣王、小转轮王，及诸方域粟散小王、大仙人等，乃至刹利大家、大婆罗门、大富长者，如是次第，以见如来妙色之身，复见己身于大恐怖生死海中得解脱故，生大踊跃欢喜之心，于如来边起知恩心，起报恩心；于如来边听受法已，各各皆于十业道中作不放逸行，以是方便力因缘故，于十恶道中速得舍离。当于是时，所得十地大菩萨者，以此菩萨眼道所及照了之处大地微尘，彼等微尘虽复甚多，而彼时节诸众生界，乃至知于烦恼体性污染不净，从于无为涅槃道中入彼无

余涅槃道者，倍多于彼。汝今当知，诸佛如来为如是等大利益故，方便显示劫烧尽也。”

尔时，一切大仙人等闻是语已，生惊怪心：“呜呼！奇哉！甚大希有！大德释子向者唤我为大仙人，发我寿命。我时虽闻如是之事，犹谓非真一切智也。今以世间难中之难，具足施已。我今始知释子真是一切智也。我于今者，以于真实名号称之。”

尔时，一切大仙人等即发是言：“大功德聚者，无边大智者，知一切智者，我见众生持业星流，各各别异，何处得成真实聚集？惟愿世尊为我解说，令得开悟。”

尔时，世尊即告大仙人言：“汝大仙人，当知无有时方，亦无处所，令得众生真聚集也。大仙人，惟平等中众生得聚集，一乘道中众生得聚集，菩萨地中众生得聚集，无余涅槃界中众生得聚集。汝今当知，如有众流、河泉、渠渎，一切川源，皆归大海；入大海已，得一味住，谓一咸味无差别也。大仙，汝今当知，所有众生界若得漏尽者，一切彼处于解脱味中会一味住。汝今当知，我虽说言烦恼平等中众生得聚集者亦非聚集也。所以者何？譬如大风旋起，吹诸蚊虫一切聚

集，若风定已，各各星散；如是诸类一切众生，各各皆为业风缚故，或堕地狱中彼辈得聚集；业风缚故，或时饿鬼中彼辈得聚集，或有<sup>1</sup>畜生中，彼辈得聚集如是等。”

仙人复言：“一切识一切智者，愿为我说，若有如是如是等辈，已于先世俱人中生共同聚集，今日现在云何可知？乃至一切若在畜生、若在饿鬼，已于先世曾聚集者，云何可知？愿为解说。”

佛言：“大仙人，所有众生，若先世时，共地狱中曾聚集者，于现在世若相见时，心不欢喜，生瞋结恨，或时头痛，或复失禁大小便利，当知是辈，已于先世地狱之中曾聚集相。若有如此相貌现时，应当觉知：彼与我身决定已曾于地狱中一处居来。”

时，大仙人复白佛言：“一切能人证大寂者，一切智者，更为我说，若先世中，曾在畜生共千万身一处来者，云何可知？”

佛告大仙人：“若彼等辈生人中者，各相见时，结成瞋怨，常觅其便，我当何处觅得其便？是名相貌在畜生中一处同居多身之相。应知决定，我已共彼在畜生中一处居来。若饿鬼中一处居来

<sup>1</sup> 龙藏：有；永乐：有；高丽：在

者，常乐臭秽，复多贪食，自设欲与他心不去离，生慳贪著，或复见彼富贵势力心生嫉妬，常复欲得彼人财物，见是相时，决定知彼与我同在饿鬼之中一处居来。若有先世同在人中共一处者，于现世中，若相见时，更生欲心。”

尔时，威灯光大仙人复白佛言：“若先世时，共在天中同一处者，今世人中若相见时，云何可知？”

佛言：“大仙人，若有先世，共天中生，现在人中若相见时，各以眼道远相摄取，共相眷爱。若有是相，决定天中共聚集来。若以如是相观察者，得知众生聚集相也。”

尔时，大仙人闻是语已，欢喜踊跃，生希有心，即白佛言：“世尊！我今始知彼众生辈成实可言大虚诞也，云何迷没不求修学萨婆若也？”

尔时，世尊更复重告大仙人言：“汝向问我，内众生体有几微细者？大仙人，若有众生体可得者，彼众生体可得作分微细长短。汝今当知，譬如有人从生盲瞽，复有一人问彼人言：‘人者白色为似何者？’于汝意云何？彼既不见，可得说言此色如是、如是色也？”

仙人答言：“彼人既不明了见色，何敢如此

决定判也？”

佛言：“如是，如是。大仙人，是诸凡夫人如似生盲者，不见众生体，不可言道如是众生微细内体长短粗涩。复次，大仙人，眼非众生，耳、鼻、舌、身、意等亦非众生，有为阴分亦非众生，十八界、十二因缘亦非众生，众生名字亦不可得，亦非内空、外空、内外空得名众生也。所以者何？大仙当知，眼即假名，暂时不相合故；耳、鼻、舌、身、意等假名，暂时不相合；五阴法假名，暂时不相合；三十六种不净之物，一切假名，暂时不相合。如是等无有众生而可得也，亦非色等诸尘共相和合故有。众生色等诸尘各各别异，分张离散，彼等诸法亦非众生，非命、非养育、无主、无人、亦无有我，皆不可得。复次，大仙人，若有众生者，是诸如来则不应说四种四谛法，以实无有众生性故，是故一切诸佛如来得是诸法，如是随顺，如是修行，得如来身。”

尔时，威灯光大仙人为欲求得一切智故，发大弘誓，作如是言：“世尊！设我今者有大火坑，尽其劫际应处其中；复有大山犹如须弥，其山岩峻，高远峙立，乃至上到阿迦尼吒天，于彼时中，我身在上，自坠而下；复有大火其聚犹如劫尽时



火，如是等火猛焰炽然，五热炙身，其日长远，一日时分等于一劫，如此劫时，以三十日持作一月，满十二月以为一年，如是时节尽彼劫际，修此苦行，欢喜甘受，终不因是暂舍精进，而不求于一切智也。”

尔时，威灯光大仙人作是语时，于大会中所有的一切五通仙人，皆悉从座恭敬而起，合掌向佛，作如是言：“世尊！我等诸仙从今已去，皆各勇猛勤力精进，所欲求于阿耨多罗三藐三菩提。”

是诸仙辈作此言已，尔时，世尊即从眉间放诸光明，其光名曰无能降伏者。十方一切诸佛世尊眉间白毫放诸光明亦复如是。当于是时，以佛光明力因缘故，是诸大地六种震动，所谓动、遍动、等遍动，涌、遍涌、等遍涌，觉、遍觉、等遍觉，起、遍起、等遍起，震、遍震、等遍震，吼、遍吼、等遍吼；东涌西没，西涌东没，南涌北没，北涌南没，中涌边没，边涌中没，乃至上下涌没亦复如是。

尔时，十方诸佛世尊于虚空中，在于释迦如来佛上雨种种华、种种妙香、种种天乐，随心所爱，令众见闻。复有乾闥婆王并及无量诸天众等，皆悉作于五种音乐，以乐如来。复于一切诸乐音

中，出于种种赞叹之声，歌咏如来。是诸天香又有微风徐徐而动，吹是香气爇熏垂布，于如来前遍覆虚空。复有十方诸来菩萨摩訶萨等一切大众踊跃欢喜，各于佛上雨种种华、种种璎珞、种种珍宝、种种杂香、种种华鬘、种种涂香、种种末香、种种衣服、种种幡盖，诸如是等无量无边供养之具供养如来。复有余方无量无边诸天众等，皆大欢喜，亦于空中雨天上妙曼陀罗华，及于摩訶曼陀罗华诸如是等供养之具，以供如来。时，诸大众生希有心，复以自己所著种种殊胜衣服，普散佛上供养如来。

尔时，无能降伏大光明焰，上至阿迦尼吒天，下至阿鼻地狱，遍照十方一切诸佛大会之众，围绕一切彼诸如来，作围绕已，是大光明从彼而来，还至世尊顶上而入。

尔时，长老须菩提即从座起，前<sup>2</sup>至佛所，顶礼佛足，礼佛足已，右膝著地，长跪合掌，以偈颂曰：

无有不因今释迦 放妙光明遍诸刹  
愿佛怜愍我等故 大众因说除疑心  
以睹世尊现威容 或更怀疑或欢喜

<sup>2</sup> 龙藏：前；永乐：煎；高丽：前

是中或复举一手 踊跃赞叹佛世尊  
帝释梵众四天王 充遍虚空叹佛德  
雨天香华璎珞具 乐器不鼓出妙声

尔时，世尊即告长老须菩提言：“汝今见是威灯光大仙人不？”

须菩提言：“唯然，世尊！我已见之。真正行者，我已见之。”

尔时，世尊复更重告须菩提言：“须菩提，汝今当知，是威灯光大仙人者，于未来世，过是贤劫千佛世已，复更有劫还名为贤，刹名月主，于彼界中，当得作佛，号毗婆尸如来、应供、正遍知，十号具足。须菩提，汝当知之，彼毗婆尸如来出现于世之时，其有得闻是佛名者，无不获利，犹如意珠随心愿满。复次，须菩提，汝当知之，今此会中八万四千诸仙人辈，闻是法本已，悉皆获得不退转地，当于弥勒下生之时，一切满足十地愿行，过三千劫已，当得作佛，号曰威灯如来、至真、等正觉。今此大会之中，复有无量亿诸菩萨众闻是法本已，皆得首楞严三昧、上上智威三昧、如来受位三昧、如幻化三昧、四大难降伏三昧、意王三昧、海藏三昧、调伏庄严三昧、真心藏三昧、清净三昧如是等。复有亿恒河沙等

诸天之众，皆得住于无生法忍；无量百千比丘、比丘尼、优婆塞、优婆夷，皆悉得于阿罗汉果；恒河沙数天、龙、夜叉、乾闥婆、阿修罗、迦楼罗、紧那罗、摩睺罗伽、人、非人等，未发心者，皆得发于阿耨多罗三藐三菩提心。须菩提，汝今当知，我见是等大利益故，放是光明。”

尔时，世尊复出舌相遍覆面门，彼舌相中出种种色，种种光明，所谓青、黄、赤、白、紫绀琉璃、红缥金色、玻瓈色等；是光明曜遍到十方无量无边诸世界已，还从如来足下而入。

尔时，无尽意菩萨从座而起，偏袒右肩，右膝著地，长跪合掌，而白佛言：“世尊！如来无有无因缘故现于舌相，惟愿世尊为我等说，何因何缘出现舌相，放是光明？”

佛告无尽意菩萨言：“善男子，我为无信诸众生等出是舌相，如來世尊终不以此舌根相故作妄语也。”

尔时，无尽意菩萨复白佛言：“世尊！若未来世诸善男子及善女人，于此经中，若以一句，若以一偈，为他显说，其福几何？惟愿说之。”

佛言：“善男子，所有十方诸佛刹中，诸佛世尊眼所见者，彼等一切资生乐具，悉以供养十

方一切诸佛世尊，乃至入于大般涅槃，般涅槃后，复以一切种种宝物起舍利塔，若复有人于此真如法本之中，乃至一句及以一偈，分别为他而显说者，所得福德乃多于彼。复次，善男子，若有说是法本之时，能于是中赞言‘善哉快哉’之者，当知彼人，一切诸佛皆共赞叹。若有供养是经典者，当知彼人即是供养于我身也。”

尔时，世尊普观大众，观大众已，即告之言：“诸善男子，若此经典所在之处，如是地分，一切诸佛皆共忆念。诸善男子，当知是经于未来世阎浮提内诸众生边为大良药，若人能于是经典中，若自转读，若教人读，一遍、二遍及三遍者，当知是人自请如来转妙法轮。若有善男子于是经典，若自抄写，若教人抄，当知彼人即是受持一切诸佛甚深法藏，常得欢喜，速获安乐，于未来世当得作佛。若有善男子、善女人，应堕地狱者，终不闻是微妙经典；诸善男子及善女人若得闻是妙经典者，舍是身已，必得生于清净国土。复次，善男子、善女人等，得闻是经，闻已欢喜，信乐受持，广为他人读诵解说，当知彼人速得菩提，毕定不久六根具足，五眼清净，临命终时，不忘正念，复当得彼无量无边百千三昧陀罗尼门，所

谓入于一切诸佛三昧、普照奋迅三昧、总持藏三昧、髻珠印三昧、灌顶位三昧、观印三昧，复得无字篋陀罗尼、一切法无能降伏陀罗尼、决疑陀罗尼、真如决义陀罗尼，如是等无量无边百千陀罗尼，复得五神通，于生死处，正念不乱。”

尔时，世尊即告文殊尸利菩萨摩訶萨言：“善男子，汝已供养无量无边百千诸佛故，我以此法付嘱于汝，汝当来世广为他说如是法本。文殊尸利，于汝意云何？汝已过去，于诸佛所，种种供养，种种恭敬，种种奉迎，是诸福德可得边际、可得思量不？”

文殊尸利言：“不也。世尊！”

佛言文殊尸利：“若汝于未来世，于此娑婆世界五浊世中，广宣流布如是法本所得福德倍多于彼。文殊尸利，汝于过去诸世尊所，虽复以于种种衣服四事供养，常令丰足，而汝未曾于是法本为他人故方便显说，以如是故，于彼佛边犹多过咎。若汝于彼过去佛边，乃至一佛未曾供养，但能于是深妙法本为他广说，当知即是于一切佛诸世尊所具足供养，无有过咎。”

佛说是经时，文殊尸利诸菩萨等，及威灯光一切仙人，并余眷属、天龙八部、诸鬼神等，一

切大众，闻佛所说，欢喜奉行。

《佛说大威灯光仙人问疑经》卷终

## ● 结诵仪

### 补阙真言

(三编)

南無喝啰怛那. 哆啰夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛那. 吽. 泼抹拏. 娑婆诃.

### 三皈依

(一编)

自皈依佛，当愿众生，体解大道，发无上心；  
自皈依法，当愿众生，深入经藏，智慧如海；  
自皈依僧，当愿众生，统理大众，一切无碍，和南圣众。

**南無佛 南無法 南無僧** (合掌三称)

**南無一切如来、应、正等觉** (合掌三称)

**南無本师释迦牟尼佛** (合掌三称)

## 回向偈

(一编)

诵经功德殊胜行 无边胜福皆回向  
普愿沉溺诸有情 速往无量光佛刹  
十方三世一切佛 一切菩萨摩诃萨  
摩诃般若波罗蜜

## 回向偈

(一编)

愿以此功德 普及于一切  
我等与众生 皆共成佛道



此咒置经书中可灭误跨之罪



南无护法韦驮尊天菩萨

